

# Pilihan panel *Editor*



**NAZRY MOKHTAR**  
nazry@sph.com.sg  
Timbalan Editor

Dalam seminggu pelbagai kisah dan berita yang dimuatkan akhbar ini. Dalam ruangan ini, panel editor BH/BM memilih tiga berita yang meninggalkan kesan kepada mereka.

## Soal ikatan masyarakat S'pura terus disebut, dibincang...

ISU perpaduan dan jurang perbezaan dalam masyarakat mendapat tumpuan dalam dialog Persidangan Bicentennial Singapura yang diadakan awal minggu ini.

Persidangan dua hari itu bertujuan meneroka bagaimana Singapura boleh menimba pengajaran daripada sejarah dalam mengharungi cabaran dan perubahan dunia.

Menjawab soalan tentang bagaimana Singapura boleh terus kekal di dunia pada hari pertama sesi dialog anjuran Institut Pengajian Dasar (IPS) itu, Timbalan Perdana Menteri Heng Swee Keat menekankan perihal pentingnya usaha mengekalkan perpaduan rakyat untuk membentuk masa depan yang cerah bagi Singapura.

“Semangat perpaduan dalam negara kita genting – perasaan bahawa kita semua warga Singapura dan ingin Singapura maju.

“Bagaimakah kita mengekalkan semangat ini? Itulah soalan penting (yang perlu dihuraikan),” ujar Encik Heng, yang berkata sejarah menunjukkan bahawa negara berpecah belah apabila rakyatnya tidak bersatu padu.

Dalam dialog pada hari kedua, diplomat veteran, Profesor Tommy Koh, berkata usaha mengekalkan keharmonian



kaum dan menjadikan Singapura masyarakat lebih saksama harus menjadi antara keutamaan pemimpin generasi keempat Singapura.

Ini termasuk meninjau tuduhan diskriminasi dalam pengambilan tenaga kerja dan menjadikan Singapura masyarakat tanpa kelas.

Sememangnya, isu-isu perpaduan seperti ini adalah perkara genting yang wajar diberi perhatian sedang Singapura

mengorak langkah mengharungi masa depan yang penuh mencabar.

Hakikatnya, rakyat Singapura hidup dalam harmoni.

Tetapi, tentunya usaha merapatkan pertalian masyarakat boleh terus diperluas dan bantuan bagi golongan yang ketinggalan boleh terus dikembangkan sejajar dengan impian membina sebuah masyarakat yang penyayang dan inklusif di Singapura.